

欽定古今圖書集成

方輿彙編職方典



欽定古今圖書集成方輿彙編職方典

第五百七十九卷目錄

四川總部彙考一

四川建置沿革考

四川疆域考

有圖

形勝附

四川星野考

四川水利考

四川賦役考

四川風俗考

四川驛遞考

四川兵制考

職方典第五百七十九卷

四川總部彙考一

四川建置沿革考

總志

禹貢梁州之域漢置益州部刺史察舉巴蜀廣漢犍爲牂牁越嶲等郡治無常所東漢益州刺史治雒唐貞觀中於此置劍南道爲西川至貞元歲增置東川府於梓州是稱兩川開元中置劍南并山南東西道採訪處置使而劍南治蜀宋爲西川路後分西川爲東西兩路南渡後又

分益梓利夔四路安撫司俱以守臣兼領又置  
提點刑獄司於嘉定重慶潼川三府元置四川  
等處行中書省又置西蜀四川道廉訪司俱治  
成都明置四川等處承宣布政使司領府九州  
六軍民府四

皇清戡定全蜀以烏撒軍民府隸貴州餘因之

四川疆域圖



四川疆域考

總志

東至湖廣巴東縣界三千七百里

西至南蕃牟力結界一千二百四十里

南至雲南武定府界二千二百里

北至陝西寧羌界一千三百一十里至

京師一萬七百一十里

東西廣四千九百四十里南北袤三千五百一

十里

形勝附

河圖括地象褒斜為前門熊耳靈關為後戶

蜀都賦緣以劍閣阻以石門

元和志西控吐蕃南撫蠻獠

新志瞿塘邛峽瑣其東南岷山劍閣阻其西北

四川星野考

史記天官書二十八舍主十二州益州為參分

漢書巴蜀分井鬼參又云觜觶參主益州

晉書天文志自畢十二度至東井十五度為實

沈於辰在申分野屬益州又益州入參七度

隋書益州分參丹元子步天籙天帝西垣第四

星曰巴五曰蜀

唐書劍南道分井鬼又云南自岷山嶓冢負地

之陽

宋史益梓利夔四路分井鬼又曰東井與鬼鶉  
首也盡巴蜀漢中之地

河圖括地象岷山之下爲井絡帝以會昌神以  
建福言蜀之分野也午山張庭云井絡卽鶉首  
華陽國志仰稟參伐蜀紀帝居房心決事參伐  
是爲蜀分

天文占候太白血畢觜鎮星主井五車卿星弧  
矢星俱主益州

天文次舍井十度至鬼柳爲鶉首於辰在未

### 四川水利考

總志

蜀中諸水咸出岷山江源在羌地之列鵝村所  
謂半膊嶺者分爲二派一西南流爲尖囊大渡  
河一正南入溢村至石紐過汶川歷今灌縣境  
又有湔水出焉灌之上流西北十數里有水出  
尤溪口又數十里有水出白沙口同會於灌經  
灌西南流者今謂之南江卽禹所導岷江正流  
自秦李冰鑿離堆引江水循灌城東注北折於  
是始以東南正流爲南江經離堆薄灌城而東



古今圖書集成  
水部典  
北注者爲北江北江出自寶瓶口穿三泊洞而  
北注者爲外江自寶瓶口直東入五斗口而東  
北注者爲內江蓋北江折爲二江并南江而三  
其北行入五斗口一支在南北二江之上故以  
內江別之外江北經崇寧彭縣新繁漢州界出  
金堂峽內江東經郫縣崇寧界下過府城北南  
會府城前江以趨於彭合彭山金堂諸水會於  
瀘州合綿涪諸水并嘉陵江經合州會於重慶  
合碶雅諸水會於嘉定合松潘之西南入尖囊

大渡河者會於敘州遠近溉田不可勝計然各  
府塘堰皆民間自修官課其成而已獨李冰所  
鑿離堆山設立都江堰在岷江中流時歲工費  
巨萬元至元元年廉訪僉事吉當普建白用石  
包砌諸堰爲石門以時啓閉明初加意水利州  
縣與軍衛屯所共役人夫五千竹木工料計田  
均輸修葺堰得不壞成化九年巡撫都御史夏  
垣以遠人赴役不便將郫灌二縣雜派科差均  
敷得水州縣專備工料以供堰務弘治九年添

設按察使僉事一員專一提督都江堰各府州水利於時灌縣知縣胡光伐石冶金卽舊址甃砌爲防貫以鐵錠柱三各長一丈二尺使當湍勢石堤中貫鐵處固以油灰直長一十五丈高一丈三尺闊五尺首闊一丈二尺用鐵三萬二千二百餘斤高廣丈餘長倍之桐油五百麻線二百木二千五百各色工役計二十五萬三千二百有奇正德間水利僉事盧翊親詣督理疏濬直抵鐵板得秦人所書六字訣曰深淘灘淺

作堰大書觀瀾亭上以昭末鑒先是每年起工役有不均之歎翊乃下令以糧三石派夫一名分八班凡八年一周而蜀府每年亦助青竹數萬竿委官督織竹籠裝石焉明末丁亂修葺無人都江堰衝決數百丈沙石填淤非復秦碑之所誓矣

皇清順治十六年巡撫都御史高民瞻監軍道程翔鳳合文武捐銀二千兩雇募番徠修築開濬暫資灌溉然每歲當春或遇恆暘水苦不足欲重

修故堰以障狂瀾工役之費動需巨萬乃上無公帑之儲下少疏鑿之衆惟恃蒞茲土者先事督修少通故道則溝洫畝澮皆注澤流膏矣

四川賦役考

總志

川北久歸版籍於順治十年已經清丈上下川南康熙元年清丈川西川東康熙六年清丈所有各府州衛土司并營兵開墾止照十年分數日開載嗣此招墾勸課歲增歲報時勢然也四川布政司所轄全省康熙十年分止實徵丁糧額數

實在民戶共三萬九千六百六戶男婦共七萬八千六百八十一口

古今圖書集成  
實熟田地通共一萬四千八百一十頃三十六  
畝五分三釐二毫二絲九忽四微七塵七纖九  
沙八渺

又下地估種一千六百一十六石一斗二升九  
合

通共見載稅糧三萬八百二十八石八斗九升  
四合三勺四抄二撮七粒一粟四沙

總共見徵丁條屯糧銀三萬八千四百兩三錢  
二分九釐二毫九絲二忽二微四塵三纖二沙

八渺該本色京斗米菽荳共八千九百六十四  
石九斗四升一合九勺六抄一撮八粒四粟  
又土司見載折徵糧銀三百八十二兩三錢三  
釐

又營兵開墾田地八十七頃五十二畝九分六  
釐一毫六絲一忽八微載糧五十石四斗一升  
六合九勺六圭六粒三粟應徵條糧銀一百七  
兩八錢二分一毫八絲七忽二微七纖三渺

附茶法

明洪武五年令四川產茶地方每十分官取一分三十年令成都重慶保寧三府及播州宣慰司各置茶倉歲徵川中課茶貯倉召商中買與西番易馬勅戶部差行人一員於陝西河州臨洮四川碶門等處省諭把隘頭目不許私茶出境駙馬都尉歐陽倫坐令家人犯私茶事覺賜死至末樂六年勅戶部陝西四川地方多有通接生番偏僻小路嚴諭把隘頭目查禁緞疋絹帛私茶青紙出境違者犯人與把關頭目俱各

凌遲家遷化外貨物入官同伴若能自首免罪給賞於成化七年罷差行人四川巡茶并罷播州茶倉令分巡道往來禁約之嘉靖四年巡撫都御史王軌巡按御史馬紀題奉以水利僉事帶管茶法每年布政司差官赴南京請印引日五萬道送與管茶官收貯分別等地芽茶每引三錢葉茶每引二錢聽商赴管茶官處報中給以引日照買照賣立限截角回繳禁革湖茶不許越界進貢番彝不許夾帶私茶其該賞茶斤

行布政司查給茶課與稅初皆本色一以易馬一以賞番至是俱折收銀兩備買茶賞番及買馬之用嘉靖二十年巡撫劉大謨議茶法六條甚善僉事崔廷槐議歲引五萬因全黎地方發賣茶引太少致令各商私販反多虧損官稅利入私家又各商報中茶引多在巫山建始二縣地方收買至嘉定稱驗嘉定與黎雅逼近各商夾帶私茶到彼易於展轉越入通番姦弊蝟興除廣餘茶有碍律例外今依題准五萬引數聽

商報中收買委官於巫山縣以上夔州府扼吭之處稱盤撥運至嘉定州地方黑水尾委官再稱雅州又復盤驗方分撥天全黎州地方照時發賣如議舉行隆慶三年巡撫嚴清題疏本省每年戶部關引五萬道半填芽茶半填葉茶以二萬六千道爲腹引每引芽茶三錢葉茶二錢二萬四千道爲邊引內一萬九千八百道給黎雅各商每引芽茶三錢八分葉茶二錢五分二百道給本地思經羅純產茶處所土民每引芽

茶七錢六分葉茶五錢松潘四千道稅與腹引同共稅銀一萬三千八百六十三兩然邊引報中者多恆苦不足腹引常置於無用之地蓋向來腹多邊少者無非謹中外之防也然腹地有茶而漢人或可無茶邊地無茶番人或不可無茶故邊引易行而腹引常滯先此議茶法者曰茶乃番人之命不宜多給以存羈縻節制之意是矣乃邊引愈少私販愈多祇爲姦人作利罔耳又曰四川茶法不縮卽陝西馬政有妨此尤

未深考夫番地最廣近者彌月遠者彌年陝西止是洮岷與松潘接境於黎雅邈不相及今不增松潘而增黎雅之引於陝西馬政何妨自隆慶三年始將原引五萬減去一萬二千道於黎雅邊引加一萬道每引量加一錢而稅銀已充其舊額而邊腹相安矣監察御史王廷瞻會題每年茶引三萬八千道內將三萬道作黎雅邊引除二百道產茶地方報中每引照舊芽茶七錢六分葉茶五錢給思經羅純二萬九千八百

道給商每引芽茶四錢八分葉茶三錢五分子  
舊俱增一錢四千道給松邊四千道腹引照舊  
芽茶三錢葉茶二錢通計一萬四千二百六十  
七兩萬曆三年巡撫曾省吾題准將驛傳鹽法  
茶水利合爲一道又於黎雅邊引內除四百九  
道給思羅茶戶納稅商人止二萬九千三百九  
十一道矣明末獻賊蹂躪之後園荒商小引目  
皆廢茶法無紀矣

按前洪武中命秦蜀歲收巴茶聽西番商人以  
馬易之大抵茶四十斤易馬一匹故曹國公以  
茶五十餘萬斤易馬一萬三千五百十八匹中  
國頗獲其利其後私茶出境馬價遂高乃差行  
人禁約永樂至成化歲以爲常厥後或令布政  
司委官或令按察司分巡官雖沿革不同而以  
巡視禁茶則一也近年以來法弛人玩朝廷雖  
禁之而權要私主之致令商旅滿關隘茶船徧  
江河每茶百斤私稅白銀二錢或金五分一年  
所得不下五六萬兩以是而歸之官不愈於填



私藏哉或曰此路不開恐陝西之馬益貴殊不知陝西四川茶路各異今四川名雖禁茶實未禁也而陝西之馬未聞甚貴若以爲終非舊制則舊制之所以禁茶者正恐私茶多而馬貴也今四川既不易馬何故而禁茶哉或又謂恐惹邊釁不過天全黎州爭路稅茶每每相殺耳今若通茶官徵其稅則當禁彼勿得重徵何釁之有自宋元至成化皆資是以裕國用彼古之人獨無所見哉

皇清循舊制嚴飭關禁招園戶恤商民產茶州縣二十九處行茶小引約有萬餘將來茶政殷繁實基於此但園戶之荒墾相循商引之盈縮不一課稅歲無定制止照康熙十年分數日通省見徵茶課銀三百二十一兩二錢二分四釐二毫九絲四忽七微五塵見徵茶稅銀三千七百九十七兩四錢七分二釐

附鹽法

一鹽課之設明初以來額銀二萬七千餘兩後

增至七萬一千有零額數存而實徵無幾以致嘉靖年間具題減免議於小票引票二項稅銀湊充復於萬曆十三年前院赫題允實徵井課銀三萬六千六百有零後因有各州縣井塌丁逃難完請豁未蒙具題以致屢年鹽課拖欠終無完局爲今之計或照審編法三年一次選委廉能府佐官一員於產鹽州縣單騎清查要見舊井出鹽者計有若干倒塌若干逃故若干新開產鹽若干逐一清查造冊申報以憑裒益施行庶罷民少甦賠苦而姦民亦不得隱匿矣

一川省產鹽地方與淮鹽大不相侔商人報中引票止共徵稅銀六兩三錢議於合屬井課湊解秦省充餉四場產鹽處所每月額中三百二十道計一年該三千八百四十道約該稅銀二萬四千一百九十二兩奈何法久弊生鹽快與私販表裏爲姦乘機夾帶越境貨賣無日無之以致引票空懸額數而商人報中者稀自今以後嚴行各產鹽州縣痛加釐革每季捕獲私鹽

多者官行獎勵仍從優敘捕獲私鹽少者或奪俸或另議庶人心儆惕而姦宄潛蹤矣

一徵收鹽課蓋在有司不肯立法稽覈痛革快頭吏書包侵之弊調停竈戶拖欠之端以致國課有損年復一年不得完納况今奉有新題事例自後該管產鹽州縣額課定要完及八分以外三年考滿方准給由如完不足者不准給由仍聽叅治則功令明而人思自効矣

一產鹽州縣通行貨賣稅則固一然而雲陽大寧發賣之所尤致淆亂雖經本道填給小票任其商販或照鹽千斤或五百斤不等私行無忌非法之平也本道職專鹽法豈容任從多照合申飭自今以後俱要聽本道則例每張止填照鹽一百斤不許多填漏稅違者拿究則法令嚴而小票庶可通行矣

一各商貨賣鹽斤俱有定例每二萬三千斤爲一引無容增減申飭不啻嚴矣近訪四場商人知法者固多而玩法者不少或借一引而照四

五引之鹽推原其故因各稱盤衙門沿襲陋規有官七吏三之謠不肯盡法稱掣任憑姦商串同衙役打築大包夾帶公行故耳若能照引票鹽斤稱掣何患私鹽之少乾賠之課無抵也自今以後嚴督盤驗衙門痛革陋規細加稱驗如違定行叅處庶上下交儆而國課得疏通矣一川中民貧鮮貲所稱爲鹽商者多係山陝之民聽其有本自來耳勢難強也近二十年來引票稀少欠課二十餘萬前胡以無虧而今胡以

頓減哉如本道所縷指禁私販禁大包禁陋規嚴秤驗亦既詳哉言之矣而猶有病根之極重者蓋自稅監權稅以來每引票一道增五兩一錢五分則二十年來通得增銀四十餘萬矣夫正稅六兩三錢而監稅又五兩一錢五分商民出本既倍則取息亦倍安得不大包夾帶哉既大包夾帶則一引可當二三引矣又安有餘銀以足三千八百四十引之數哉且此項稅銀又不係布政司正解之數曾奉前朱按院行查竟

莫悉其故倘蒙兩院明告於上捐此無名之徵而鹽法不清國課不裕者未之有也

皇清清理鹺政當蜀民欲盡之餘民力無多煎燒不易如福興華池富義永通四廠夔屬雲萬太寧順屬南西蓬州重屬彭忠等井間有假物力倩人工爲之者或井老山童泉深坍塌輸課賠累勢不能給遂多棄去斥鹵別圖生計者况今戶少人稀行鹽有限貿易近無專商多係農民乘間逐末或朝販鹽斤暮操耒耜是以井眼開塞

竈戶去留商民消長引票盈縮每歲課稅尚無定額至於水路小引每票載鹽五十包陸路小引每票載鹽四包而從前大引暫停不用以大引所載與井竈所出商力所辦實相懸絕然定制垂久待興亦有漸矣

康熙十年分止通省見徵鹽課銀四千三十七兩六錢八分一釐鹽稅銀六千四百七十五兩七錢六分五釐

附錢法

明初錢鈔兼行金銀之物貴賤有差蜀人止用  
苧銀米布貿易貨物而錢鈔絕不行巡按御史  
屠鏞言於巡撫都御史張瓚請遣義民持銀數  
千兩易錢於江南等處散民間行之錢盡而令  
亦罷焉萬曆五年奉旨疏通錢法布政司遵依  
戶部咨送萬曆通寶錢式開局鼓鑄行令各府  
州縣衛所將貯庫存留缺官空役驛傳商稅銀  
各照地方繁簡衝僻約用錢若干解銀若干赴  
司轉發錢局鑄造每錢十文扣白銀一分公私

並用一體通行如濱江郡邑或以爲便亦一兩  
而上銀錢聽其自便而山僻間以此累民者有  
之崇禎末年用鵝眼錢每百值價三四分不等  
錢法之敝至此極矣

皇清底定全蜀一切經費多從他省協濟若欲鼓鑄  
開局置爐購銅倩工錢本費用未易措給且土  
著殘黎初服先疇奚暇居市肆以權子母通都  
大邑商賈經營多係秦楚越豫之人行商挾重  
貲遊千里囊負千文料亦難勝目前自難舉行

俟之生聚蕃息可也

四川風俗考

漢志民食魚稻無凶年憂

華陽國志益州之俗文多於質故其民柔弱土地沃美人士俊乂

隋志人多工巧綾錦雕鏤之妙侔於上國

通典蜀巴之人少愁苦而輕易蕩佚戰國秦資其財力國以豐贍厥後治者建立學校自是蜀士學者比齊魯焉

四川驛遞考

總志

自成都府錦官驛新都軍站廣漢驛北由潼川  
 州之古店軍站五城驛建寧軍站皇華驛秋林  
 軍站雲谿驛保寧府境富村軍站柳邊驛龍山  
 軍站錦屏水馬驛槐樹軍站施店軍站柏林軍  
 站柏林遞運所龍潭軍站問津水馬驛沙河軍  
 站神宣軍站神宣遞運所抵陝西寧羌州境為  
 北路

自廣漢驛西北由成都府境金山驛西北驛武



平驛小溪驛溪子驛水進驛小河驛三舍驛抵松潘衛為北路

由成都府境廣安驛邛州境白鶴驛雅州境百丈驛雅安驛新店驛箐口驛黎州境沉黎驛越嶲衛境河南驛鎮西驛利濟驛龍泉驛瀘沽驛建昌衛境溪龍驛瀘川驛阿用驛祿馬驛會川衛境巴松驛大龍驛會川驛腰驛黎溪驛抵雲南武定府北界為西南路

由府屬之龍泉驛陽安驛南津驛珠江驛安仁

驛敘州府屬之龍橋驛重慶府境峯高驛東臯驛來鳳驛白布驛朝天驛渡江  
由百節驛百渡驛東溪驛安穩驛播州境松坎驛桐梓驛播川驛永安驛湘川驛仁水驛湄潭驛鼇溪驛岑黃驛白泥驛抵湖廣偏橋界  
自湘川驛西南昌田驛沙溪驛黃平驛抵貴州之興隆衛界為東南路

由成都府境永康驛太平驛寒水驛安遠驛護林驛抵茂州

自茂州折而西北由長寧驛來遠驛歸化驛鎮  
平驛古松驛亦抵松潘衛為西路

自錦官驛遞運所水路由成都府屬廣都驛木  
馬驛龍爪驛眉州境武陽驛眉川驛石佛驛青  
神驛峯門驛嘉定州境平羌驛凌雲驛嘉定州  
遞運所三聖驛沈犀驛下壩驛敘州府境月波  
驛宣化驛真溪驛牛口驛汶川驛敘州府遞運  
所李壯驛龍騰驛瀘州境江安驛董壩驛納溪  
驛瀘州遞運所瀘川驛黃艤驛神山驛牛腦驛

史壩驛重慶府境漢東驛石門驛石羊驛棘溪  
驛銅罐驛魚洞驛朝天驛重慶遞運所木洞驛  
龍溪驛蘭市驛涪陵驛東青驛花陵驛雲根驛  
忠州遞運所漕溪驛夔州府境壤途驛集賢驛  
萬縣遞運所巴陽驛五峯驛南沱驛永寧驛夔  
州遞運所高唐驛抵湖廣巴東界為東路  
自陝西漢中南界水路由九井驛朝天驛問津  
驛龍灘驛虎跳驛蒼溪盤龍驛順慶府境龍溪  
驛平灘驛嘉陵驛重慶府境太平驛合陽驛土

沱驛至重慶府入大江為北水路

自敘州府水路由馬湖府境羅東溪泥溪驛入

東川軍民府自瀘州境納溪驛納溪遞運所渠

壩水驛大洲水驛峽口水驛入永寧宣撫司為

南水路

由永寧永安驛永建遞運所普市驛摩泥驛赤

水驛阿永驛烏撒府境層臺驛周泥驛瓦甸驛

黑張驛普德歸驛抵貴州北界為陸路水陸驛

遞

皇清開復全川後四川督撫司道因時度勢酌量衝

僻於順治十六年康熙二年六年三次設陸站

五十一水站三十四

四川兵制考

總志

總督四川軍務部院軍門一員駐劄重慶康熙

七年奉裁今設兼制川湖駐劄荊州府

督標中軍管中營副將一員中軍守備一員

左營遊擊一員中軍守備一員

右營遊擊一員中軍守備一員

撫標左右營中軍遊守等官舊設奉裁

提督四川總兵官左都督一員駐劄成都府

提標中軍管中營遊擊一員中軍守備一員

左營遊擊一員中軍守備一員

右營遊擊一員中軍守備一員

川北鎮總兵官一員

鎮標中軍管中營遊擊一員中軍守備一員

左營遊擊一員中軍守備一員

右營遊擊一員中軍守備一員

重夔鎮總兵官一員

鎮標中軍管中營遊擊一員中軍守備一員

左營遊擊一員中軍守備一員

右營遊擊一員中軍守備一員

遵義鎮總兵官一員

鎮標中軍管中營遊擊一員中軍守備一員

左營遊擊一員中軍守備一員

右營遊擊一員中軍守備一員

永寧鎮總兵官一員康熙七年改設副將

鎮標左營管中軍遊擊一員中軍守備一員

右營遊擊一員中軍守備一員

建昌鎮總兵官一員

鎮標中軍管中營遊擊一員中軍守備一員

左營遊擊一員中軍守備一員

右營遊擊一員中軍守備一員

水師鎮總兵官一員康熙七年改設副將

鎮標中軍管中營遊擊一員中軍守備一員今

裁

左營遊擊一員中軍守備一員

右營遊擊一員中軍守備一員

松潘協鎮副將一員

協標都司僉書一員

成都城守副將一員

左營都司僉書一員中軍守備一員

右營都司僉書一員中軍守備一員

重慶城守副將一員

左營遊擊一員中軍守備一員

右營遊擊一員中軍守備一員康熙七年奉裁

松潘城守守備一員

潼綿營守備一員隸成都城守營

通巴營守備一員

順慶營守備一員隸川北鎮今裁

昌寧營遊擊一員中軍守備一員

黔彭營遊擊一員中軍守備一員

巫山營遊擊一員中軍守備一員

達州營遊擊一員中軍守備一員

太平營都司僉書一員

合州營守備一員今裁以上隸重慶鎮

仁懷營守備一員隸遵義鎮

建武營遊擊一員中軍守備一員

敘馬營遊擊一員中軍守備一員

馬邊營守備一員

大壩營守備一員

龍場壩守備一員以上隸永寧鎮

冕山營遊擊一員中軍守備一員

會川營遊擊一員中軍守備一員

寧越營守備一員

越嶲營守備一員

會鹽營守備一員

黎雅營遊擊一員中軍守備一員

峩邊營遊擊一員中軍守備一員

化林營守備一員以上隸建昌鎮

龍安營叅將一員中軍守備一員

威茂營叅將一員中軍守備一員

小河營遊擊一員中軍守備一員

漳臘營遊擊一員中軍守備一員

壘溪營遊擊一員中軍守備一員

平番營守備一員

石泉營守備一員以上隸松潘協

建昌衛守備一員

守禦禮州所千總一員

守禦打冲河中前所千總一員

守禦德昌所千總一員

守禦左所千總一員

守禦右所千總一員

守禦前所千總一員



會川衛守備一員

守禦迷易所千總一員

守禦左所千總一員

守禦右所千總一員

鹽井衛守備一員

守禦中左所千總一員

守禦左所千總一員

寧番衛守備一員

守禦冕山所千總一員

守禦中所千總一員

越嶲衛守備一員

守禦鎮西所千總一員

守禦左所千總一員

松潘衛守備一員

黎州大渡河守禦千總一員

瀘州衛守備一員

欽定古今圖書集成方輿彙編職方典

第五百八十卷目錄

四川總部彙考二

四川物產考

四川總部總論

職方典第五百八十卷

四川總部彙考二

四川物產考

總志

紫柏 灌口西有古樹圍八九丈上有寄生木亦大數圍傳言秦物也土人名曰紫柏

金果 江瀆廟前有樹六株其樹高五六十丈圍約三四尋挺直如矢無他柯榦頂上纔生枝葉皮如龍鱗葉如鳳尾實如棗而加大每歲仲冬有司具牲饌祭畢然後採摘迎入公廨差點

醫工以刀逐箇剝去青皮石灰湯焯過入熬冷  
蜜浸五七日漉起控乾再換熟蜜如此三四次  
卽入瓶缶封貯進獻州中人謂之金果番中名  
爲苦魯麻棗蓋鳳尾蕉也

蜀柳 齊劉悛之爲益州刺史獻蜀柳數株條  
甚長狀若絲縷武帝植於太昌靈和殿前常觀  
歎曰此楊柳風流可愛似張緒少年時其見賞  
如此

犀浦古楠 犀浦國寧觀有古楠四皆千歲木

也枝蔓雲漢聲挾風雨根入地不知幾百尺而  
陰之所庇車且百輛正晝日不穿漏夏五六月  
暑氣不至凜如九秋蜀中固多壽木然莫與四  
楠比者

蜀荔枝 荔枝敘馬瀘涪合俱出嘉定富順亦  
有之敘馬瀘爲上涪合爲次嘉定今止一二株  
舊屬蜀藩華陽國志載漢宣帝時荔枝開日二  
千石張具其下邀賓賞之一騎紅塵妃子笑蓋  
從棧道入關耳涪舊有妃子園顆最肥大馬馳

古今圖書集成  
二  
七日夜卽抵長安其速如此所謂無人知是荔枝來也重慶榮昌諸處又聞亦有龍眼白居易爲木蓮荔枝圖各紀其狀曰荔枝生巴峽間樹形團團如帷蓋葉如冬青花如橘春榮實如丹夏熟朶如葡萄核如枇杷殼如紅繒膜如紫綃瓤肉潔白如冰雪漿液甘酸如醴如酪若離本枝一日而色變二日而香變三日而味變四五日外色香味盡去矣  
萊公柏 寇萊公知巴東縣嘗手植雙柏於縣

庭後巴人思之謂之萊公柏

巴橘 巴邛人家有橘園霜後盡收斂有大橘如三斗盎巴人異之剖開每橘有二叟鬚眉皤然肌體紅明皆相對而戲談笑自若一叟曰橘中之樂不減商山但不得深根固蒂爲人所摘耳

古桂 省城元妙觀中有桂二株對植於仙臺左右雙幹交枝老根蟠露不知幾百年矣四時清陰覆地十餘丈秋日花開黃金萬斛香廳十

里殊爲奇絕

異栗 蜀中青城山出天師栗似栗而小獨房者爲異久食可治風孿相傳張道陵手植七十株在上清宮

玉真花 青城山出玉真花差小者號寶仙淺者爲醉太平白爲玉真古稱爲石端聖花

凌雲蕙 凌雲山產蕙葉長而圓花英極盛香馥他蕙莫及俗云雅州蘭烏尤蕙

異楠 嘉定州兌說峰下有楠三株畱雲蔽

午終歲黛色諸峰葱菁楠所助也匠氏謂之背陰斲之無香不中採用故存非楠之幸哉

異柏 嘉定清音亭前有異柏四株霜皮黛色其葉一則瑣細如剪一則扁仄如片一則垂絲如椰一則蝟刺如毛異於他柏

松喬 嘉定洗墨池有松四枝撐出如長蛟擎空柔條曲糾北折而南旣垂且仰鬱然偃蓋大如車輪爾雅云小枝上繚爲喬扶疎曲翹是謂松喬

古今圖書集成  
四  
壁竇草 峩峩山有壁竇草光如螢火或隱或見雖赫日不掩

塔松 峩峩山有松狀如杉而葉細圓偃蹇如浮圖

莎蘿 峩峩山莎蘿坪有花木一種每莠數株多者十餘枝並開共蒂大可尺圍色有大紅有粉紅有白燦爛如錦散滿谷嶼中山僧呼爲莎蘿花十餘里皆有之諸名山所無瓦屋山亦出莎蘿花五色如爛錦照映山谷移之他處則槁

江安二松 江安三清觀有二松高十數丈每晨昏烟雲鬱鎖不散

邛竹 出邛州之邛崃山卽古臨邛地也漢張騫奉使西域得高節竹還而植此今人取以爲杖鶴膝者佳又敘州亦出此竹雅州復有一種名羅漢竹皆爲杖之具

蒟醬 見相如揚雄左思諸賦中註云緣木而生其子如桑椹蓋熨道通越嶲之地出蒟熨人取以爲醬熨地卽今敘州也問之莫答或云今

之鷄鬃油及須中窠葉皆相彷彿晉灼註拘音  
矩徐廣註拘亦作蒟音窠

蒙頂茶 名山縣蒙山上青峰甘露井側產茶  
葉厚而圓色紫赤味略苦春末夏初始發苔蘚  
庇之陰雲覆焉相傳甘露大師自嶺表攜靈茗  
播五頂舊志稱頂茶受陽氣全故芬香唐李德  
裕入蜀得蒙餅以沃於湯餅上移時盡化以驗  
其真傳稱雅州蒙山上有露芽故蔡襄有歌曰  
露芽錯落一番新白樂天詩茶中故舊是蒙山

吳中復謝人惠茶詩吾聞蒙山之嶺多秀山惡  
草不生生淑茗皆謂此茶也

雷鳴茶 蒙山有僧病冷且久遇老父曰仙家  
有雷鳴茶俟雷發聲乃出可併手於中頂採摘  
服未竟病瘥精健至八十餘入青城山不知所  
之今四頂茶園不廢惟中頂草木繁重人跡希  
到

太湖茶 瓦屋山太湖寺出茶味清冽甚佳詩  
人詠之曰品高李白仙人掌香引盧仝玉腋風



虞美草 益州草木記雅州名山縣出虞美人  
草人或歌曲應拍而舞西陽雜俎云舞草出雅  
州或云如鷄冠花葉兩兩相對或云中出一莖  
旁兩葉相對似決明

古榆 眉山有古榆一株在蘇祠門外左隅相  
傳老泉手植至今枝葉榮秀

古荆 眉州文廟左右有紫荆樹各一株蒼古  
花甚盛相傳宋元時所植

文木 宋太祖乾德五年合州漢初縣上青樛

木中有文曰大連宋又瑞應山於景德中出異  
木生文成天下太平字魏了翁有記

桃異 榮昌峯腦山崖畔有巨石縫中突出桃  
一株高丈餘葉榦與凡桃異花實不常宣德中  
桃實各圍尺許每遇結邑必有登第者宋人有  
題詠邑令張秉義名之曰桃香仙嶺

蓮異 榮昌有瑞蓮寺宋進士姚東之讀書處  
山高十數尋石池水泉不竭中產蓮二種從石  
縫中出左紅右白花不實根不藕開亦不常紅

兆科第白兆豐年

竹異 黔江縣斑竹山上有仙池池邊每歲生斑竹二株及尾則環連焉

桂異 涪州南長灘里內崖下有古桂樹花不

常開其年有士登科則花石上有桂巖二大字

稻異 鄆都稻名重思其米如石榴子粒稍大

味如菱杜瓊作重思賦曰霏霏春暮翠矣重思

雲氣交被嘉穀應時

木蓮 巴嶽山有木蓮樹高五六丈葉如榿枏

花如菡萏出山則不植尚書王世貞異物志特紀之宋周惇頤觀巴嶽木蓮詩有枝懸縞帶垂金彈瓣落蒼苔墜玉盃之句

著草 漢平鄉縣費貽宅有著草生其上有雲

氣覆之明成化間又生於南安鄉

金樹 保寧物產中有金樹上有鏤刻文可觀

人多取以薦香

不灰木 會川衛產木火煅不化土人取以為

燈心既燼復燃故名不灰木或曰火浣布乃此

古今圖書集成  
八  
物織成也

桃花犬 宋淳化中羅江縣貢桃花犬常循於御榻前太宗不豫犬亦不食及升遐號呼不食以致疲瘠見者隕涕參政李至乃作桃花犬歌以寄史館李若水末句有云白麟赤鴈且無書願君書此儆浮俗後遂失其種

雪蛆 產於岷峩深澗中積雪春夏不消而成者其形如蝟但無刺肥白長五六寸腹中水身能伸縮取而食之須在旦夕否則化矣

香豬 土犬 建昌松潘俱出香豬小而肥肉頗香人冬醃以餽土犬亦小而肥美羣遊稻田中一犬登樹而望如有捕之者則先鳴吠令衆犬奔逸去

白蟹 嘉定州凌雲寺白蟹間出祝融峯泉中黑頭魚 在大佛沱春初出上止九泓下止烏尤

鯪 雅州有魚曰鯪卽鯢魚有四足大者長尾聲如嬰兒善緣木天旱輒含水上山以草覆身

張口露水如鳥來飲水因吸食之性有毒出溪江

潛龍 瑩華山有潛龍歲盛夏常出下海異他處

異蛇 宋度宗時益州產大蛇背有黃花斑身甚長神光遠燭口吐椒花香熏灼數里殺人畜無數府差甲士千餘人撲捕之蛇以尾掉以尾捲溺死者甚衆帝命張真人及蜀中法士治之戮死遺骨如山

異鳥 漢孝宣帝黃龍中越雋之南獻背明鳥形如鶴止不向明巢常對北多肉少毛聲音百變聞鐘磬笙竽之聲則奮翅搖頭時人以為吉祥

長鳴鷄 孝成帝時越雋獻長鳴鷄即下漏驗之晷刻無差長鳴一食頃不絕長距善鬪

麟 前蜀時有麟見於長泉里中是歲王衍僭立以為己祥即其地建院

豬鯉 青神縣宋初百年前有牝豬伏於水次

化爲二鯉在泉中而莫有見者蘇子瞻偶見之  
以告其友王愿愿以爲誕子瞻因禱於泉二鯉  
復躍出

酆都白鹿 酆都白鹿山與平都對峙昔時林  
木茂密相傳有白鹿藏此每令有佳客至則先  
夜輒鳴邑令往往以此候驗之

水驢 綦江縣明月沱在治南觀音堂百步之  
外中有水驢見則致旱

犍牛 蜀山中有大牛重數千斤名爲犍牛晉

大興元年此牛出上庸郡人伏弩射殺得三十  
八擔肉卽爾雅所謂犂也

猛豹 猛豹似熊而小毛淺有光澤能食蛇食  
銅鐵出蜀中

狃狃 峽山在漢嘉嚴道縣南江水所自出也  
山有九折坂出狃狃似熊而黑白駁亦食銅鐵  
也

酋耳 周末昌中涪州多虎有獸似虎而絕大  
逐一虎噬殺之錄奏檢瑞應圖酋耳不食生物

遇虎則殺

峽猿 峽中猿鳴清徹山谷其響泠泠不絕行者歌之曰巴東三峽猿鳴悲猿鳴三聲淚沾衣

龍毛 益州雒縣寺塔為龍所護側有三池莫知深淺三龍居之人莫敢臨視貞觀十三年三

龍大鬪雷霆震擊水火交飛久之乃靜人皆拾得龍毛長三尺許黃赤可愛一作龍鬚

湔水魚 湔水在威州治內玉壘山下石峽出泉滴注洞中碧澄瑩澈有魚長七八寸者隊遊

其中不增不減相傳為神魚人不敢食上有古木蟠根蒼翠蔚然雖溽暑如秋

龍馬 馬湖府三百里外有湖四圍皆峻崖長二十里廣七里中有堆如螺髻狀去大江二里其水與江流同消長日夕作潮昔有龍馬見於湖郡因以名

建昌異鳥 建昌衛產異鳥有二首名曰雙頭鳥

寧番異獸 寧番衛產異獸名曰雪裏眠蓋狐

貉之類也其皮毛可以禦寒

金蟹 凌雲寺金蟹池泉穴出蟹大如金錢有士人讀書其旁夜半汲水見一蟹如盂大急取而置之器中覆而壓之明日視之已失其所在矣

伏龍觀魚 灌縣離堆山卽李太守所鑿以導江處上有伏龍觀下有深潭傳聞二郎鎖孽龍於其中霜降水落或時見其鎖云每有羣魚游泳潭面僅露背鬣其大如牛投以石魚亦不驚

人亦不敢取之蓋異物也

錦江龜異 成都大江有龜潛深淵底父老相傳其形甚大人不常見見則必有沉溺之患其行有定處上止青陽橋下止濯錦橋並不他及或云張儀城蜀時有龜出江中循其跡而築之名曰少城龜之異蓋自古而然矣

鱗兒獻瑞 瀘州九姓司南澗繞流時當盛世漁人每見麒麟隨波隱見故名

寶珠金鵝 瀘州九姓司環堵皆山丘垤中出

一井水流異味土人常見金鵝朝去暮宿建立寶珠庵於上

四川總部總論

漢書

地理志

巴蜀廣漢本南夷秦并以為郡土地肥美有江水沃野山林竹木蔬食果實之饒南賈滇犛僮西近邛笮馬旄牛民食稻魚亡凶年憂俗不愁苦而輕易淫泆柔弱褊阨景武間文翁為蜀守教民讀書法令未能篤信道德反以好文刺譏貴慕權勢及司馬相如遊宦京師諸侯以文辭顯於世鄉黨慕循其跡後有王



古今圖書集成  
褒嚴遵揚雄之徒文章冠天下由文翁倡其教相如  
爲之師故孔子曰有教無類武都地雜氏羌及犍爲  
牂柯越嶲皆西南外夷武帝初開置民俗略與巴蜀  
同而武都近天水俗頗似焉

隋書

地理志

梁州於天官上應參之宿周時梁州以併雍部及漢  
又析置益州在禹貢自漢川以下諸郡皆其封域漢  
中之人質朴無文不甚趨利性嗜口腹多事田漁雖

蓬室柴門食必兼肉好祀鬼神尤多忌諱家人有死  
輒離其故宅崇重道教猶有張魯之風焉每至五月  
十五日必以酒食相饋賓旅聚會有甚於三元傍南  
山雜有獠戶富室者頗參夏人爲婚衣服居處言語  
殆與華不別西城房陵清化通川宕渠地皆連接風  
俗頗同漢陽臨洮宕昌武都同昌河池順政義城平  
武汶山皆連雜氏羌人尤勁悍性多質直皆務於農  
事工習獵射於書記非其長矣蜀郡臨邛眉山隆山  
資陽瀘川巴東遂寧巴西新城金山普安犍爲越嶲

牂柯黔安得蜀之舊域其地四塞山川重阻水陸所湊貨殖所萃蓋一都之會也昔劉備資之以成三分之業自金行喪亂四海沸騰李氏據之於前譙氏依之於後當梁氏將亾武陵憑險而取敗後周之末王謙負固而速禍故孟門不祀古人所以誠焉其風俗大抵與漢中不別其人敏慧輕急貌多蕞陋頗慕文學時有斐然多溺於逸樂少從宦之士或至者年白首不離鄉邑人多工巧綾錦雕鏤之妙殆侔於上國貧家不務儲蓄富室專於趨利其處家室則女勤作

業而士多自閑聚會宴飲尤足意錢之戲小人薄於情禮父子率多異居其邊野富人多規固山澤以財物雄使夷獠故輕爲姦藏權傾州縣此亦其舊俗乎又有獯狂蠻竇其居處風俗衣冠飲食頗同於獠而亦與蜀人相類

宋史

地理志

川峽四路蓋禹貢梁雍荆三州之地而梁州爲多天文與秦同分南至荆峽北通劍棧西南接蠻夷土植

古今圖書集成  
宜柘繭絲織文織麗者窮於天下地狹而腴民勤耕作無寸土之曠歲三四收其所獲多爲遨遊之費踏青藥市之集尤盛焉動至連月好音樂少愁苦尚奢靡性輕揚喜虛稱庠塾聚學者衆然懷土罕趨仕進涪陵之民尤尚鬼俗有父母疾病多不省視醫藥及親在多別籍異財漢中巴東俗尚頗同淪於偏方殆將百年孟氏旣平聲教攸暨文學之士彬彬輩出焉

地理通釋

巴蜀

甘茂曰張儀西併巴蜀之地北取西河之外南取上庸

索隱張儀伐蜀蜀王開明戰不勝爲儀所滅

張儀說楚王曰秦西有巴蜀大船積粟起於汶山浮江已下至楚三千餘里舫船載卒一舫載五十人與三月之食下水而浮一日行三百餘里里數雖多然而不費牛馬之力不至十日而拒扞關扞關驚則從竟陵以東盡城守矣黔中巫郡非王之有

蜀見於牧誓地與秦接通典云所謂巴賈彭濮之

人秦惠王使司馬錯伐蜀有其地利州益昌縣古劍閣道秦伐蜀所由謂之石牛道陳子昂云昔蜀與中國不通秦以金牛美女啖蜀侯侯使五丁力士棧褒斜鑿通谷迎秦之餽秦隨以兵而地入中州元和郡縣志武王伐殷巴人助焉後封爲巴子其地東至魚復西犍道接漢中南極牂柯是其界也戰國策秦伐蜀十月取之蜀旣屬秦秦益強秦紀惠文九年滅蜀華陽國志云蜀之先肇於人皇之際黃帝爲子昌意娶蜀山氏後子孫因封焉秦

滅蜀因滅巴通典巴國今巴壁蓬集合忠萬是其地蘇氏曰秦之憂在六國也蜀最僻最小最先取楚最強最後取

圖書編

處置

四川西南奧區上則松茂建昌番夷時肆侵暴下則播西石柱土司互爲劫掠控制消疎非一朝可圖者也成都素稱沃野賦重役繁供億稱詘敘州地饒而高珙諸夷兵費不貲且大木多產其境採辦之擾商

民殘疲重夔土寇連結施州諸夷虔劉未已而妖人  
內訌受患尤烈保順重疲民朴務簡馬湖僻小民夷  
相安龍安新造全在經始大抵蜀地夷漢雜處氣習  
靡淳地理遼邈巡歷難遍加以大木之困大兵之殘  
民貧多盜勢使然也是在撫按廣於咨詢司道勤於  
躬歷率有司持廉省費愛養撫綏數年之後或者蜀  
其有瘳乎

擇守令

川雖僻阻然巴蜀沔益之饒或時仰給焉且蕃蔽吳

楚東南上游表裏滇隴西南要地得其人則治以安  
否則亦易擾亂前代之往轍烟鑑具在也故漢第五  
珂張堪廉范李膺唐韋臯李德裕宋張詠趙抃馮京  
崔與之諸公此其人皆廉能將相之器而又俱久於  
其官故卓然各有稱述保茲西土而或以僻遠易之  
過也

慎守要害

四川馬湖敘州二府逼臨蠻獠華與夷雜處瀘州不  
雜夷實煩夷警成都以省藩重鎮控制西番而重慶

古今圖書集成  
雅州亦難安堵重慶東接夜郎西通牂柯俗有夏邑蠻夷雜處順慶闐無外防保寧夔州險據在我其地沃民殷諸府爲然當是海內樂土而馬湖敘州蓋略次之矣

### 水利蠶桑

蜀爲天府之地諸葛亮爲昭烈告之矣其言曰益州險塞沃野千里夫險塞則可以守沃野則可以出軍需亮蓋得策矣是建邦啓土之始也乃今觀蜀自秦守李冰鑿離堆辟沫水之害穿二江成都之中此渠

皆可行舟有餘則用灌溉百姓享其利今其堆在漢縣西一里許歸立水中可觀也蓋始未鑿堆地勢下壅沫水奔突不可控禦爲居民害而今則順流而東而水之利旱則籍以灌溉雨則不遏其流故其記曰水旱從人不知饑饉其謂是也二江則蜀志以爲一汶江一流江蓋經郡城南七里者卽冰所穿耳宋郡縣志謂一由永康過新繁入成都謂之外江一由永康過郫入成都謂之內江者卽今灌縣而所用灌溉則曰灌曰溫曰郫曰雙流曰重慶曰成都凡一州七

縣皆利之天下謂之天府也蓋昔魏襄王爲羣臣祝而曰令吾臣皆西門豹之爲人臣也史起進曰魏氏之行田也以百畝鄴獨二百畝是田惡也漳水在其旁而豹不知用是仁智未盡何足法也及起爲鄴令乃引漳灌鄴以富魏之河內而民歌之亮之智豈少區區史起之見乎然亮初慕蜀之沃野而身自爲相江水無恙也獨不聞其與群下謀鑿引以溉旁近田畝何也蓋沙河以南其原野雖廣平可田畝而地高江下不可引水卽鑿之亦不得利故亮置弗爲坐此

耳蜀志有之蜀古蠶叢之國若田地宜蠶也所從來遠矣乃張詠則蜀賢守也先是知鄂州時旣以教民拔茶植桑矣而至爲蜀宋史第稱其減鹽價以足軍餉督驕將以討叛賊吏不服牽出斬之民饑苦豫折米以待之而獨不聞其勸民植桑豈詠不知蜀地宜桑而不似鄂耶特以於時四郊多壘桑株悉膏釜爨不可復植或蠶桑故業民自利爲之不煩督勸云爾乃今保寧諸縣則家植桑而人飼蠶其絲紬綾絹旣用以自衣被而其餘且以貨諸他郡利云厚矣而錦

官以南千里無一桑株何也是未必皆出於避稅或者由惰農廢業又無所督勸之故至於今無復占是業耳若謂欲用史起智而鑿山引水灌溉沙河以南之田申張詠見而勸民植桑修復蠶叢以來之業意蒸蒸厚也愚則以爲江水不可引也陂塘獨不可鑿乎民稅可避也蠶桑獨可廢乎有如鑿塘一畝深一丈可灌田十畝鑿塘百畝深一丈可灌田千畝則白沙河以抵龍泉皆沃壤也如是行之數年而陂塘之利不與一州七縣相埒吾不信也植桑十株可供一

女之蠶植桑百株可供十女之蠶則自錦官以及戎渝皆桑陌也如是行之數年而蠶桑之利不與保寧諸縣相等吾不信也

川水辨

宋劉裕遣朱齡石伐蜀寇譙縱衆軍悉從外水取成都臧僖從中水取廣漢老弱乘高艦從內水尚黃虎史昭通鑑釋文曰巴郡今之重慶正對土水口右則涪內水左則蜀外水自渝上合州至綿州曰內水自渝上戎瀘至蜀謂之外水按外水卽岷江自重慶上敘州



古今圖書集成  
嘉定是也內水卽涪江自重慶上合州遂寧潼綿是也中水卽沱江自瀘州上富順資簡金堂漢州是曰四川者則取岷江沱江黑水白水四大川以爲名爾沈約宋書資江爲中水涪江爲內水

時務四條

蜀自李冰鑿離堆堰都江而水利自茲始矣涸脛泛肩之誓沉於洋浦深灘淺堰之諭紀於雞台洞開三泊江辨雙流我朝開濬之發夫固若是而已壘石以築堰範鍤以淘灘利水州縣如郫繁崇漢所出夫匠

歲不下千人而灌田亦幾萬計已而江之順怒不常人之機械百出其中黠者欲乘間以射利乃爲倡鐵龍之議鑄冶垂成而奔濤卒至蕩析已無餘矣又欲從而修之而不知利沒姦諛勞歸庶姓而旱澇卒無補也是豈立法初意哉或者議曰昔之遺法固在也因而飭之其誰曰不可故隨內外以導沫江因淺深以通灌口力役則計田疇以爲多寡雇役則度遠邇以爲重輕而又相下澤以疏流慎司工以勸事其庶矣乎或又曰鐵龍之議特因一時之卒漲耳未可遽

以爲非也嗟乎禹之治水水之性也故深淘淺築正得其遺意而乃高爲隄堰故與水鬪幾何其不敗也昔文翁守成都開剪泐溉灌繁田人獲其饒是亦不可爲法乎自管子謹正鹽菹而鹽法由此興矣南鹽於海北鹽於池而蜀鹽於井自贍一方於農人國計無與焉我朝開中之法行之久矣有提課以督成有鹽司以會要出鹽州縣如順義長寧大者不下數十萬小者亦不下數萬已而商之要權不時竈之貼納無出其間黠者欲巧言以奪正乃倡爲折納之議自

此鹽額十萬而今不及十千矣又欲從而議復其舊然不知舊井旣枯新井或淡出課爲眇招之不來而緩急卒無補也是豈立法初意哉議者曰昔之遺法固在也遵而行之其誰曰不可故復開中而先寬其科條清理沒而不追其旣往或暫開廢井以蘇窮困或覈出虛額以絕誅求而又稽井戶之逃移禁客戶之占佃其庶矣乎或又曰牢盆之法井戶具盆而納算商人具引而納算則竈可免於追徵而商可免於開中矣是又一說也昔楊輔總計四川收引稅井戶

稱便是又不可爲法乎屯田之制國初專以養兵分田有限徵納有時或失則多或失則寡莫不有畫一之法存焉歲月既久姦宄彌深遂使豐溪之屯徵於綿竹廣利之屯徵於龍安不知而妄議者尤欲爲清屯之令吁戶口不識占田官司不能履畝始如漢之檢覆墾田然而河南南陽至不可問其失浸遠矣或者議曰紅牌之志賞罰固在也使能守其成法按魚鱗冊籍以稽隱匿勾絕戶田畝以授餘夫明主保下田之禁止屯官徵輸之條豪右侵奪有罰貧悴貸假

有罰其孰曰非初意也或又曰有田之屯可知也無屯之田不可知也可不重加之意乎昔諸葛武侯營屯渭濱軍有宿儲無亦存乎其人耳國初茶法專以易馬與秦隴無異也歲遣巡察一人凡私越境者刑無赦嗣是廢置不常姦萌寢起遂使建始之茶私越沉黎武岡之商擅抵蒙雅不知而妄議者猶欲利其餘課十而稅一不知茶以引計不及引者則謂之由始如宋人之長短引然而又可因以爲利乎其失甚矣或者議曰金牌之制其法固在也使能師其遺意

稽截引之目而繳報以限嚴互市之令而稽察以時  
碣門之茶馬有司可復也黑水之批驗有所可復也  
番僧盜鬻有罰漢人私遞有罰其誰曰非初意也或  
又曰無引之茶可知也無茶之引不可知也是可不  
加之意乎昔趙開判成都減額以蘇園戶輕價以惠  
行商民到於今稱之無亦存乎其人耳

蜀川邊方

夫蜀古蠶叢國帶二江之雙流抗峨眉之重險緣以  
劍閣阻以石門所謂坤輿大都會是已固三面邊蠻

獠羌蕃常爲中土患今播蘭邛笮西陽石砮帖然受  
約束矣無論也獨北一隅當講求耳西北冉駝地也  
冉駝卽今威茂之境其西爲疊溪又其西爲松潘吐  
蕃氏羌諸種落雜居崖嶂箐峒險阨相雄長漢武西  
逐諸羌渡河湟居塞外始爲王土唐宋以來叛服蓋  
靡常也明朝高皇帝旣平蜀乃命平羌將軍丁玉攻  
取其地設州邑衛所棋布要害竊嘗譬之成都堂奧  
也灌口門戶也威茂松疊藩籬也犬豕之性喜人怒  
獸伺隙蹂躪藩籬不密則門戶危門戶不密則堂奧

古今圖書集成  
危此西北邊防所以重於蜀也

### 茶馬利病

唐趙贊贍軍用張滂拯水旱皆取茶稅未嘗以之易馬也宋乾德始置榷務至李杞入蜀經畫以茶易馬而法嚴矣諸方產茶蜀禁獨重國初歲遣行人巡察邊隘茶以引計市以時開成化間罷差巡茶而勅專憲臣法益備故商無越貨邊境肅清近年以來弊日滋矣夫引分邊服歲有定額也而規利者爭取乎邊商別資貫人有定數也而懷姦者弊如蝟集此所以

議者有六條之法矣以冒濫當絕也故慎引目焉以展轉當虞也故時稱盤焉以路岐易越也故謹關防焉以稱驗當擇也故重委官焉以利歸私門也故廣餘茶焉以番隙難杜也故嚴之互市焉蓋欲救乎茶之不行焉之四政者有大綱以統細目有權變以濟經常所謂要之當執而中之宜用者也苟忽乎此吾未見其能濟也

### 入川四道三谷辨

阿仲黔三秦志曰自秦入蜀有三谷四道三谷者其

西南曰褒谷南曰駱谷從洋入東南曰斜谷從郿入其所從皆殊舊志謂首尾一谷非是其棧道有四從成和階文出者爲沓中陰平道鄧艾伐蜀由之從兩黨出者爲故道漢高帝攻陳倉由之從褒鳳出者爲今連雲棧道漢王之南鄭由之從城固洋縣出者爲斜谷道武侯屯渭上由之此四道三谷者關之險阨攻取所從來固矣舊志云駱谷黨谷同一谷褒谷斜谷同一谷

內夷各土官總敘

歷觀往古唐虞三代之盛漢唐之強而邊夷警備則代有之其不至爲中國大患者皆馭得其道也故所當嚴其限而慎其防者豈獨北之鹵南之倭已哉西起巴蜀牂柯東抵襄楚包絡湖嶺東折而南南盡海上又東跨百粵三江層巒疊嶺真有飛鳥不能越猿猴不能攀者其間獠狠蠻獠各盤據深箐險峒已非一世然卒聽吾之約束者禁圍羈勒在我故也何也貪戀富貴蠻獠亦然彼世以土官雄據一方惟恐失其所固有耳伏覩洪武七年西南諸蠻夷來朝

貢者多因元官授之稍與約束定糧徭差發其土官名號曰宣慰司十一宣撫司九招討司一安撫司二十長官司一百七十二初皆隸吏部驗封後因掌土兵者改隸兵部襲替則關武選凡土官無子弟其壻與妻皆得襲替人文出十年者亦聽然皆萬里赴闕或獻馬及方物請命最謹正所謂以夷治夷彼固得倚朝廷官爵以制其黨與朝廷亦得因爵賞以制土官誠得馴擾之道也迨天順八年三月上兩宮徽號詔許土官徼呈勘奏卽與冠裳於是介使未將威福

自恣雖托羈縻之名竟開驕悍之漸成化十五年又有納穀備賑之令則經制日卑規取愈陋孝宗末年發憤釐革至正德旋復墮廢嘉靖九年始曲爲條例稍復祖宗之舊令該府州縣正二幕屬巡檢驛傳三百六十隸驗封宣撫招討安撫長官凡一百三十二隸武選隸驗封者皆領於布政司武選所隸或領於都指揮使司文武相維機權攸寓細大相關掌股易運數年來鎮巡部院諸司建白日煩紛更已甚矣故夷情叛服靡常多有不就約束者可盡委罪邊夷哉

蓋獷悍桀驁邊人之性也世相仇殺猜忌輕生烙蹠善奔忍饑行鬪其習也耽戀巢穴不敢遠離假重爵命威制服屬其勢也知其性與習則不可喜功生事輒開邊釁知其勢則彼或出沒剽掠誘我逋逃擅我疆場而我之防禦征勦格撫亦易爲力終非虜倭比也雖然亦不可視爲疥癬之疾無與於腹心也卽如麓川本百夷僻遠不當中國一郡而王驥欲立功名遂督兵五十萬轉餉半天下雖窮搜巢穴思任發卒不可得徒殺無辜數十萬驥且以功封伯其餘應陞

賞者殆萬計及再出師而東南騷擾軍民疲敝不可勝言矣若夫南贛麻陽隴水羅傍蕞爾小醜又皆界在腹內一或馭之失策未免調集客兵轉輸餽餉威未加乎醜類禍先被乎生靈近事良可鑒也司邊籌者宜慎之

四川土官

四川布政司領宣慰司一宣撫司二安撫司三長官司十二都司領宣撫司二招討司一安撫司四長官司二十二行都司領長官司五



播州宣慰永寧龍州爲二宣撫草塘黃平黎州爲三  
安撫泥溪平夷蠻夷木川播州餘慶白泥容山眞州  
重安九姓平茶峒爲十二長官其都司領者石砭西  
陽爲二宣撫天全六番招討八郎阿角寨麻匪兒芒  
兒者爲四安撫司木頭靖州岳希蓬石耶峒邑梅峒  
占藏先結簇蠟匪簇白馬路簇山峒簇阿旨峒北定  
簇麥匪簇者多簇牟力結簇班班簇祈命簇勒都簇  
包藏簇阿昔簇思曩兒簇阿用簇潘幹寨疊奚鬱卽  
爲二十四長官

右隸兵部武選

四川土官二十五烏撒芒部烏蒙東川知府四人同  
知一人龍州判官一人龍州宣府知事一人馬湖把  
事一人信寧侮佉溪麻刺村昭平堡寒冰寧戎明月  
三盆巡檢八人溪龍阿用祿馬蠻夷白水大平瀘沽  
驛丞七人改流知府一人馬湖

右隸吏部驗封

### 四川行都司

四川行都司領衛六曰建昌衛建昌前衛寧番衛越  
嶠衛鹽井衛會川衛屬所七關七堡五十有四總爲  
里六十有七屯糧五萬六千七百四十三石夏秋米

古今圖書集成  
一萬八千七百四十五石九斗鹽課米三千六百石  
有零

### 建昌考論

建昌本禹貢梁州之境天文井鬼分野乃西南夷邛  
都國地漢武帝置越嶲郡領邛都等縣晉徙郡治會  
無縣宋因之齊謂之獫狁郡後周置嚴州隋改西寧州  
後復爲嶺州治越嶲縣大業初改爲嶺郡唐初復改  
嶺州置中都督府又改越嶲郡至德初沒於吐蕃貞  
元中收復太和中徙治臺登縣懿宗時爲蒙詔所據

改此城曰建昌府以烏白二蠻寔之元至元間置建  
昌府又立羅羅斯宣慰司以統之隸四川行省尋改  
隸雲南行省明初洪武中罷宣慰司置建昌衛隸四  
川都司改建昌路爲府隸四川布政司後廢府改建  
昌衛爲軍民指揮使司尋置行都司領衛六形勝東  
連烏蒙西距吐蕃中接重慶北鄰西蜀據西南咽喉  
衝要之處雖通商貨殖田地膏腴而土廣人稀竹籬  
板舍不事修飾繕造堅利人甚畏弩末之毒嘗觀元  
遣譚澄同知宣慰司事至其境議之曰皇元一視同

仁特置大帥安輯招懷以悍外侮非利徵求於汝也  
蠻人大悅即此可以得蠻情亦以識治蠻之道矣孰  
謂蠻終不可以化誨懷服哉

四川蠻

四川山包劍棧水鎖瞿峽襟帶擁束是為天阻惟烏  
蠻阻其東南蔓繞西抵番族欲其馴順是在調擾龍  
州為松番咽喉每遮我餉道烏蒙烏撒芒部諸府雖  
仰我鼻息而內黨日堅數啓隙亂唇齒之勢彼得挾  
而擾我瀘敘之間宜有機權攜其醜類若乃碉門遠

引諸番播州旁通四省所謂與蜀盛衰者也

春明夢餘錄

四川形勢

四川天下絕險龍州松藩鎮其北播州諸夷列其南  
天全黎州當其西瞿塘守其東江山四塞關隘孤開  
可守一當百吐蕃西控烏思藏等處風俗樸魯慈教  
大行法令飭嚴行人所安非若北達烏合之衆殘侵  
無紀况以重險臨之為力又易南鄰芒部東川烏蒙  
烏撒諸蠻獠要皆腹裏肌上肉行都司六衛截制民

古今圖書集成  
夷可以安業而西之雅威茂灌南之重慶瀘嘉馬敘  
北之疊溪綿漢彭石重重遶護深藏三窟所慮奸宄  
內作地饒貯寔不能施速定之術國初從階文陰平  
道入成都取明升蓋以計破之苟非瞿塘東守之堅  
事未易成也

川之形勢北有劍門不足恃而慮在松藩松藩以孤  
城介生蕃之域乃待食於龍州懸命千里之外設爲  
羌戎所截則疊溪以南如建瓴而下直抵茂州西有  
黎州不足恃而慮在維州維州在保縣外無百里乃

爲董卜韓胡所據是切近之災且復有自靈關一道  
可抵雅州自草坡一道可抵文川縣自泄里灞一道  
可抵灌縣自清溪口一道可抵崇慶州

天全六蕃無險而險在雅州故禁門紫石二關以雅  
州所戍之

巴蜀地居極高而烏蒙特甚烏蒙南臨六詔東控諸  
蠻故畢備諸種羅羅土獠蠻夷悉聚



